

A-190

# 大赦例解

上海土山灣印書館印

No 202

天主降生一千八百五十三年 極西耶穌會士晁德蒞述

# 大赦例解


天降生一千八百六十三年

代牧鄂若瑟准

Angelo Zottoli, s.j. (晁德蒞)

TRACTATUS DE INDULGENTIIS

2<sup>a</sup> editio



上海主教惠  
重准

天主降生一千九百三十五年再版

上海徐家匯土山灣印書館印

## 自序

今夫塵寰擾攘之中，每見有貧乏者矣，繫念倉箱，纓情爵祿，營營逐逐，而無時休憩於其間。設或偶值寶礦，有不喜溢眉宇，竭智焦勞，希圖全獲者乎。不知人之生也，身貧可憂，靈貧更可憂。德性薄，則內不足，氣習染，則外亦虧。將使罪積而無功可補，惡盈而無善可償，其困何如，其乏何如哉。況乎罪惡所招，皆有稱罰。卽其纖忒微愆，一一當償者，其數不可勝計，其罰獨可勝算乎。又有久履歧途，頻致永謬，卽或已經悔改，悠殃可追，而暫罰不能寬，則所負之債，尤難爲萬一之償耳。由此觀之，苟得寶礦之藏，可以罄償重負，胥免罹罰者，未有不歡忻鼓舞，發於中情之莫可形容也，尙有視爲緩圖者乎。今則幸矣，眞寶之藏，已在前矣。蓋吾主耶穌在世時，累積勲勞，莫可窮限。兼之聖母及諸聖人，樹德立功，

亦難數計。夫凡精修之效，本具二益，一爲受報之善，一爲贖罪之功。其受報之善已疇也，其贖罪之功未罄耳。今耶穌無限之勞，已迴逾衆罪攸致之罰，而常新未艾也。又諸聖生平，其失極微，其功極大，盡補己負，功猶未罄，卽效有未盡。而其所餘者，常在天主之前，爰納於聖教會中，而奉爲寶庫。歷代教宗，卽以寶庫所藏奇績，爲教中人償債之資。每以善功分量，頒賜教會，而定或全或限之大赦焉。是卽所謂真寶之藏也。奈有許多信者，不知此例，則恩賜雖多，如爲虛設，何由而得蒙神效乎。本鐸特恐滙學弟子，亦有不甚明晰，以致屢失珍藏者，故不憚語言之艱澀，不掩文理之淺陋，率爾操觚，用陳例解。間有不盡著明者，爲非諸弟子所易收效，故不贅述。識者諒余之素志，卽鑒余之苦心也夫。

峇威豐三年八月下浣

極西耶穌會士晁德莅題

# 大赦例解目錄

## 聖教會大赦總說

大赦原義之旨

全限大赦之辨

得大赦之要端

讓煉靈之確解

## 聖母會大赦總例

聖母會之肇始

聖母會之本意

聖母會全大赦

聖母會限大赦

## 聖衣會恩赦備述

聖衣會初進階

聖衣會四大益

前三益之要義

大赦例解

目錄

一 一 二 三 八 九 九 〇 一 一 三 一 五 一 五 一 六 一 六

大赦例解 目錄

第四益之要端 一七

青聖衣恩赦敘述 二一

始胎聖衣緣起 二一

週年一齋廣益 二三

青聖衣全大赦 二三

青聖衣限大赦 二六

諸聖物大赦例規 二九

教皇所諭四端 二九

四端所附七解 三〇

諸聖物全大赦 三一

諸聖物限大赦 三二

諸聖功大赦例次 三四

素行神功大赦 三四


簡行善功大赦 三七

習誦經文大赦 三九

選誦經言大赦 四四

## 聖教會大赦總說

凡人於天主也，一獲罪而二累隨之，一曰罪惡，一曰罪罰。罪惡者乃即侮主之戾也。罪罰者，乃即應受之刑也。而其應受之刑，亦判永暫。永則陷於永獄，主慈不復享，魔虐不能逃。暫則懲以暫苦，或困於生前，或煉於身後。今聖教會中，既以聖洗之禮，全赦已往諸愆，凡罪之惡與罰，罰之永與暫，均蒙寬宥而無遺。旋乃以告解聖事，為赦罪中之惡，兼恕永罰之刑，易為暫罰。而其暫罰，何以補哉。上古聖教，雖或偶陷於罪，亦定重罰償之。蓋命以或三年，或七年，或十年，或二十年之嚴齋，甚至一生難堪之苦功，亦不易恕也。嗣因人罪極加，而神熱極減，故聖教以諸聖餘裕之功，益以吾主無窮之績，為償人罪之負，而頒寬釋之恩，是即所謂大赦也。大赦之恩，惟宥暫罰，至於死罪惡，至於永獄刑，至於未解之





一微忒、一小過、均非其所寬赦焉。此則大赦之要旨也。

夫大赦有二、一曰全大赦、一曰限大赦。全大赦者、全寬諸罪之暫罰。故有甫得是恩而去世者、即可不經煉獄、而直登天堂。限大赦者、惟赦暫罰之一分。然其分之大小、全係於放大赦之度。譬如蒙七年四旬大赦、能得幾許暫罰之赦、適如昔日聖教中、定行七年四旬補贖、而得幾許暫罰之赦也。其七年補贖、當於聖教初、有如七年之久、每主日內、或一次、或三次嚴齋。其四旬補贖、即守四十日大齋。此大赦所有之度、與向時聖教中補贖所償之度、一一相稱也。惟其補贖所償之度、俱在天主意中、而未可妄測耳。由是推之、今日大赦、較之昔時補贖、苦功既免、而神效仍沾。且或本罪所膺之罰、適與限赦所免之罰、彼此相稱。則既得限赦、已無可受之罰。此限赦之效、亦有與全赦相當者也。

凡欲蒙大赦之恩，務宜全盡要端。若有一功，本係至要，因惑於無稽之說，而任意缺之，則不蒙大赦之益矣。蓋恩赦之效，洵不關未定之見，惟係的實之義耳。胡可不留神於大赦之要端乎。大要有三。

一、須保聖寵之恩，斷不可偶有重罪。

二、須立蒙赦之志。

三、須以虔心誠意，全行教宗諭旨。

上三端，不論全限大赦，皆爲至要。下列四端，則惟爲全大赦所需也。四、贖罪之私，皆必除淨。若留微罪之係戀，卽喪大赦之全恩。蓋未赦其罪惡，斷不赦其罪罰也。

五、須行告解，雖或未犯重罪，亦不得懈此神工。

六、須領聖體，若教皇諭上，無此要功，自屬可免。然除苦路及臨終全赦

外，鮮不以領聖體爲要也。

七、須誦經言，謹按教皇之意。

上所論者，約有七端，每端須再畧解之。其一，雖或舉功之時，仍有大罪，而於未完之先，能除此惡，亦可得大赦之恩，此乃諸大學士公論也。譬如教皇放一大赦，諭定誦經三日，雖或二日誦經，尙有大罪，而於第三日內，先驅罪惡，後竣聖功，亦可得其大赦。

其二，或立蒙赦之意，而失記於後，則如之何。曰：若不收回前意，仍行所定要工，雖行工時，未能記憶，亦不失大赦之恩。譬如定志蒙赦，而妄告解，誦要經，至明日已忘此意，而領聖體，仍可沾其神效。夫先期所立者，曰：效存之意。若領聖體時，重訂前意者，則曰：現立之意。總之，效存之意，足蒙大赦，不必有現立之意矣。且依大學士公論，其效存

之意，亦可於竟日之內，均蒙其效。譬如平日清晨時，矢立總意，願得日工所有大赦，卽大有益於靈魂。

其三、或問舉工之時，若不虔意誠心，并有微罪，卽喪大赦之益否。曰、若微罪之染，在於是工大體之內，則不獲大赦之效，譬如誦經爲虛榮之向，是也。若微罪之染，祇在是工大體之外，則不由是而失大赦之恩，譬如誦經而稍涉紛心，是也。又問，或不全行要工，而稍有微虧，其於得大赦，何如。曰、若惟有纖微之虧，仍可全蒙大赦。有如玫瑰經中，失一二遍聖母經，守大齋內，少許用食等，皆是。又問，教皇所定要工，必訖於蒙赦定時否。曰、然。凡遇有瞻禮日，而教皇另寬之，則自前日申正始，至本日酉刻終。若無瞻禮日，而無另寬之條，則自昨日半夜始，至本日半夜終。又問，教皇所放全大赦，每以領聖體爲要。然領

聖體，一日惟可一次，亦可於一日中，兼蒙數全赦否。曰可。治理大赦之聖會，已有定論矣。但於其餘要端，務宜盡舉也。其諭在天主降生一千八百四十一年羅瑪府發。又問，分內當誦之經，即可代教皇所定之經否。曰否。蓋前諭中，已明戒之也。

其四，雖或偶有微罪，不能於全赦之益，盡行獲效。然于已悔之罪之罰，仍可蒙赦也。蓋雖一過未悔，一過不赦，而餘罪既悔，餘罪自赦。餘罪既赦，則相稱之限大赦，奚不可如量以得之。

其五，格肋孟第十三位恩免，凡信友於每主日內，習行告解一次者，則本主日之諸全赦，亦得盡沾其效，不必另行告解也。又凡信友立志于某瞻禮日欲得全赦者，亦可于前八日告解，而無不獲效矣。或曰，若惟告細微之失，鐸德但行降福禮，不誦赦罪經，亦可蒙全大赦。

否。曰可。其說于天主降生一千八百四十一年，治理大赦之會論定也。

其六、有欲得全大赦，而須領聖體者，苟于前日領之，亦可蒙效否。曰，若得大赦之時，自前日申正始，則可。此乃比阿第七位寬限也。又問，倘逢瞻禮，本有大赦，然依聖教禮，間遇一載，有踰期而行者，則恩赦之日，亦可緩否。曰，夫瞻禮大體，本含二義。一、聖教之禮。一、信友之分。若止改聖禮日期，則蒙赦之效，不能改。蓋於治禮之會，已有明戒也。若聖禮與本分，均踰日期，則據治禮會議，可改蒙赦之日。

其七、若教皇明示誦經之意，則於經中，特立本意爲是。其意約爲聖教廣揚，異端消滅，人民清泰，國土安靖，教皇榮慶也。不然，但按教皇之意，矢志誦經而已。經言亦無一定，憑己簡擇而已。或誦天主經，聖

母經各五遍、或誦聖母禱文、或誦不拘何經、皆可。卽彼啟此應而誦、亦可。

論大赦之恩、可讓煉靈者、畧舉三端。

一、凡寬赦之恩、居位者、祇可祝與屬輩、而不出於屬輩之外。故聖教所頒大赦、惟赦在世信友之罪罰、不能赦已亡信友之煉苦。蓋一則爲聖教屬輩、一則非聖教權下也。然煉獄之靈、雖不能沾教會之恩施、尙可蒙通功之神益、故在世信友、以善功讓之、亦可減煉罪之苦。總之、聖教公會、一如慈母然、旣已頒祝於在生神子、并許相通於已亡神子。由是觀之、大赦之效、歸于生者、流于亡者、而非拘一類也。蓋恕生者之罪罰、適如真赦然。而恕亡者之罪罰、止如哀矜然。至論大赦之讓、煉靈果否蒙恩、亦無定論。曰諾者甚多、曰否者亦不少。蓋天主未嘗親許之、故煉

靈之惠、沾與不沾、但依天主之仁、允與不允而已。

二、凡讓大赦於煉靈者、其要有三。一、讓煉靈之大赦、應遵教宗恩諭。二、讓赦之意、貴於專持。三、得赦之時、須無大罪。其有告解神功、定爲得赦、要端者、則得赦之前、定當告解也。其有告解神功、不定爲得赦要端者、數大學士、亦各持一說、未有公論。究之、持論不同、而舉功無異也。則告解雖不列於要端、爲負大罪者、未嘗不以告解爲至妥也。三、凡蒙赦之益、或爲己靈、或爲煉靈、俱可。然二者之中、尤以讓煉靈爲最、蓋能讓煉靈、不但立愛德之功、卽天主宏慈亦必酬報也、人亦何靳而不爲與。

### 聖母會大赦總例

昔者、耶穌會士梁鐸、在羅馬教習、仰體聖母仁慈、保護之恩、無不徧



及而於肄業弟子爲尤切。因命弟子齊備神功，誠敬聖母，此卽聖母會之始也。在會弟子，均蒙神益，時沐聖恩，嗣此普傳漸廣，利益及人者，亦復不少。教皇額我畧第十三位，允准會例。後試斯篤第五位，格肋孟第八位，額我畧第十五位，又有本篤第十四位，相繼而復准之。遂頒本會大赦，用擴主仁。

今夫聖母會之成也，有理會司鐸，爲之口講指畫，以明斯會本意，及所當守之規。有正領袖一，副領袖二，協輔司鐸，以理會中事務，惟日周旋於會友之中，以其嘉言懿行，振率同人。其下有會議焉，職掌品題，而議報名進會之可否等事者也。有書記焉，職操珥筆，而錄會中諸友之名於冊者也。凡諸會友，一主日內，會期一次，齊集一堂，以務神功，此乃聖母會之所由成也。由是進會之功效，已可思繹矣。蓋不獨平生恒荷聖

母之幃幃、如遇患難、疾病、誘惑、臨終之候、慈佑無間也。且藉理會司鐸之教誨維持、大獲神益。夫居恒德容親炙、慰誨頻聆、其於神功要務、未有不漸臻純粹也。況本會中、科條嚴密、賴以約束行動、兢兢遵循、自然中節。并值會期、聆本鐸之提撕、持循不失、自能遠罪進脩。更於會友中、非無懿行堪師、嘉言足取、我苟則效有心、則功脩何難日進。卽或有時胸襟抑鬱、志氣墮頽、顧慮逡巡、前程難赴、一經本會友之扶持慰藉、仍可振作己神、功脩復懋焉。又有公同祈禱、以得所求、相通會功、以增本益。至於全限大赦、亦復不少。其律備詳於左。

### 全大赦

- 一、凡進會本日、真悔告解領聖體、可得全大赦。
- 二、臨終之時亦然。

三、本會首主保瞻禮，有全大赦。但當真悔告解領聖體，又自前日申正，至本日日沒時，該赴本會堂，虔心誦經。

四、本會次主保瞻禮亦然。

五、會友于耶穌聖誕、升天、聖母領報、升天、始胎、聖誕瞻禮，真悔告解領聖體者，亦得全大赦。

六、本會日期，每主日有一次全赦，惟必真悔告解領聖體，方可。又在本會堂中，務宜虔誦經文，爲聖教廣揚，異端消滅，人民清泰，國土安靖。凡會友一主日內，或二次，或三次，齊集行功，則可憑己簡定一次，而蒙全大赦。若會友咸集，在午後行功，則其得赦之期，或於本日，或於明日，均可憑己簡擇。又一年之內，二次總告，或由上次總告，或由幼時總告，則不拘何堂中，領主誦經，亦可得全大赦。

七、凡理會本鐸、送聖體於本會病友、而以神誨勵之。且於苦像前、令其誦天主經、聖母經、各三遍、皆按教皇及聖教意者、即可付病友全大赦。八、不拘何鐸、於本會祭台、理會本鐸、於不拘何台、爲亡友作祭者、其煉靈可受全赦特恩、如於特恩台上作祭者然。

九、凡於羅馬聖處、所得之大赦、會友均能得之。但於得赦定日、亦宜到本會堂、虔誦天主經、聖母經、各七遍。若不便至本會堂、而奔趨別堂亦可。夫聖處之全大赦、教皇比阿第六位所頒者、有四。耶穌建立聖體、復活、升天、聖誕、四瞻禮是也。至聖處之限大赦、列於末節。

### 限大赦

- 一、凡送已亡教友之葬。
- 二、或爲臨終者、或爲已亡者、懇祈天主。

三、或聽聖論、或瞻聖禮。

四、與瞻煉靈聖禮。

五、平時無瞻禮日、望彌撒。

六、晚間謹慎省察。

七、撫慰貧病者、顧視囹圄者。

八、勸人和睦。以上善功、每次有七年大赦。

九、聖處之限大赦有四。一、耶穌聖誕後三日、立耶穌聖名、三王來朝、封齋前三主日、耶穌受難、望復活、復活後七日、大祈禱三日、聖神降臨本日、及降臨後六日、以上每次有三十年三十次四旬大赦。二、聖枝瞻禮、有二、十五年二十五次四旬大赦。三、聖灰瞻禮、封齋後第四主日、耶穌聖誕前第二主日、聖誕前一日、聖誕本日、子時及昧爽之彌撒中、均有

十五年十五次四旬大赦。四封齋內，每日有十年十次四旬大赦，並於降臨前一日，秋冬季小齋三日，聖誕前第一第三第四主日，亦然。統計所列恩赦，俱可讓於煉靈。

按以上聖處限赦，教皇庇護十一位一概改爲十年大赦，一千九百三十二年四月十二日頒。

### 聖衣會恩赦例解

凡欲進聖衣會者，但當於有權之鐸，敬受聖衣而已。在昔恒規，又必錄名會籍，始蒙本會之益。迄今此限已寬，蓋聖衣會長，曾求教宗額我畧第十六位恩准也。

夫其所製聖衣，色或緇，或棧，或韋，料當以羊毛布成之。而攸佩之帶，不拘何料，各從其便。聖衣上所繪聖母像，本爲風俗之宜，而會友之蒙恩與否，不係乎此。

論佩聖衣之正式，一方必垂於胃，一方必垂於背。若於受聖衣時，或受

聖衣後，偶違正式，則當按式佩正，可蒙會益，此聖衣會長之定論也。若日久損壞，則各自另製，不必再聖。

夫信友既進聖衣會，即可與本會四益。一、會友之益，不但本會通功，即諸修會士之諸善功，亦有相通之分。一、可得許多大赦。三、凡會友終時，佩聖衣者，即得善終，而免永禍。四、若有會友居煉獄者，至渠去世後瞻禮七，慈母即惠救上升。

論其第三鴻恩，慈母曾親示之。昔者聖衣會士西滿懇求仁母，欲得保護會友之據，庇蔭罪人之恩。倏焉聖母手持聖衣，見于天神圍繞中，即語之曰，取此聖衣，即爲我會本號，亦爲汝等蒙恩之券。凡堅信而終，并終時佩聖衣者，即免永禍。其爲上升之據，殆中之衛，慰救之憑，直逮世終，無所更易。言訖不見，此即聖衣會之原委。自今溯之，約已六百載矣。

至於第四鴻恩、聖母見于教皇若望第二十二位而親許之。總之、二恩實據、不但徵于無數妙迹、而亦准於十四位教宗矣。卽如若望第二十二位、亞立山第五位、西斯篤第四位、比阿第五位、保祿第五位、額我畧第十五位等、累頒許多大赦、其恩亦歷歷可證也。試卽大赦之例、備詳於左。

### 全大赦

一、進會本日、若真悔告解領聖體、誦經求天主、恩賜聖教廣揚、異端消滅、並求爲教宗福壽、侯王太平、卽得全大赦。

二、或於聖衣會本瞻禮、或于後七日內另擇一日者、均可得全大赦。

三、臨終時亦然、惟須誦耶穌聖名、如或不能口誦、須以心誦、其餘神功、宜隨當時之景、爲行爲止可也。



## 限大赦

一、每月告解領聖體、誦經按教皇之意、常帶聖衣者、有五年五次四旬大赦。

二、凡執燭送聖體於病人、爲彼求主者、每一次亦得五年五次四旬大赦。

三、每逢瞻禮四、無聖教命而守小齋者、卽得三百日之赦。

四、或爲亡者送殯至坎、求主早賜天國。或熱心誦聖母小日課、或本會堂中聽彌撒、瞻聖禮。或留宿貧窮者、或濟助困乏者。或爲愛人之工、或爲克己之行。或爲形矜、或爲神矜。或願與人相和、或勸他人和睦。或導人棄邪歸正、或教人明達要理、或救人免陷於罪、每次得一百日之赦。

五、恭敬聖母七樂、誦天主經、聖母經各七遍、每日得四十日之赦。以上

諸赦、教皇格肋孟第十位恩准、俱可讓於煉靈。聖衣會中除列陳諸赦外、餘恩赦亦復不少。但因為定處之赦、而非本身之赦、故不贅述。蓋教皇所施本身之赦、不拘何處、皆可得之。其為定處之赦、當至本大赦之堂、始能得之也。今聖衣會定處之赦、俱屬於會中脩士本堂、故不贅陳。凡聖衣會友、欲蒙前三益者、惟當常帶聖衣、並無別功為要。會中脩士、同有此說。然既帶聖衣、無時可脫。除洗浴外、無論晝夜、無論病健、甚至危險之中、臨終之候、常當戒慎、不離此常生之據。若脫未多時、亦不喪本日之大赦。若至一日之久、則僅失本日大赦、亦不喪本會殊恩。此乃聖衣會長確解也。

凡聖衣會中、欲沾第四恩者、即於佩聖衣外、復有二業。一、宜各按本位、謹守潔德、此本為眾人公分、而況于奉教者乎、又況為會友者乎。二、為

知文者，每日當誦聖母小日課。爲不知文者，於公大齋，并瞻禮六七小齋外，當加持瞻禮四小齋。倘於是日，適遇耶穌聖誕瞻禮，則免守其齋可也。

夫於知文者，若非大故，斷不能全缺小日課經，而易爲他功。若有正故，惟秉權之鐸，可免全誦。則或分爲七分，而每日誦一分。或但誦小日課中之亞物海星，感頌吾主，申爾福云云。斷不可憑已再易他經，用補日課之缺。至於不知文者，若有正故，可免瞻禮四小齋，易爲或聽彌撒，或拜聖體，或行哀矜之德，或行愛人之功。惟其祝聖聖衣之鐸，非卽有易功之權，當另受其權而後可。蓋治理大赦者，已定之也。倘有不幸而犯會業者，非卽莫可挽回也。惟當立時悛改，心潔身脩，忠就會範，仍能入聖母慈懷，而無有遺棄矣。

## 青聖衣恩赦敘述

今夫青色聖衣，何自昉歟？蓋前二百餘年，自一賢女，名胡蘇辣始也。賢女因盛德超羣，熱心出眾，目擊塵世之澆漓日甚，不勝心傷，欲挽回之，而力有不逮，故恒求天主，速賜移風易俗之恩。迨至吾主獻堂瞻禮日，熱心更甚於前，正當潛思翕合主時，穆然神往，陡見聖母身披白長衣一件，外又附青色之衣，手抱耶穌嬰體。聖母卽靄然謂之曰：爾容何其戚也。然繼自今，爾愛將轉爲樂矣。惟當敬聆吾愛子耶穌之訓，寺循不失耳。於是耶穌聖嬰謂之曰：爾宜於隱地靜處，立一脩院。脩女之數，三十有三。宜制青衣，令彼穿之，藉獲殊恩。賢女唯唯從命。又轉懇耶穌曰：祈主溥施洪恩，微獨於脩女得此厚貺也。倘於末俗中，振新有志，而願誠敬聖母，慎操潔德，終身佩此衣者，亦望主

賜、共沐殊恩也。幸蒙耶穌允之。維時卽見許多天神、飛至各方、以青聖衣、分與多人佩之、蓋以昭吾主之愷澤也。賢女於此樂甚、如寐復醒。卽躬製青色聖衣、分與多人敬佩。果蒙恩非淺、得益非常也。賢女歿後、本院脩女繼之、皆以奉敬聖母始胎。故此聖衣、亦名始胎聖衣。從此漸傳漸廣、愈得聖母庇蔭。不久掌理脩女之士、祈教皇格助孟第十位、賜其頒此聖衣之權。教皇允之、并准其能傳此權於別會鐸德。自此始胎聖衣、亦遞傳至中國焉。教友佩之、並無另立之章程。至其大赦、則伊古以來、未有一善功而可獲若斯之多益也。夫此聖衣之料、凡屬於青色羊毛小呢等、皆可爲之。其上不必有聖母像、惟將此青色方塊、貼於所佩聖衣後面、而僅以一帶繫之亦可。敬佩於身、一在於胸、一在於背、晝夜不離。并隨時隨地、終當佩服、庶幾獲此洪

恩、領此神益也。至論立此聖衣之意、特爲祈求天主、賜人革故鼎新耳。故經文善功、並無一定、各能憑已選擇。凡諸信友中、苟有願獻微忱、以事聖母者、能不聞斯衣洪恩、而爭先佩歟。

抑欲特敬聖母始胎者、教宗又設一法。卽爲恭敬無原罪之淨德、周一歲之期、守一大齋也。蓋於近世額我畧第十六位、恩准教友、凡於一歲之中、闡取一名、擇定一日、嚴守大齋、並進堂誦經、按教皇之意者、卽得全大赦。西士頒青聖衣者、兼給此大齋之紙。今將聖衣諸赦、陳列於左。

## 全大赦

初受青聖衣本日、每年內憑擇一日。臨終彌留時、週年避靜候、西歷每月首主日、封齋時、每瞻禮七、立定聖體瞻禮、與前後一日、苦難主

日本日、與後瞻禮六。耶穌聖誕、復活、升天、聖神降臨、天主聖三、五瞻禮。聖母始胎、聖誕、領報、受潔、升天、五瞻禮。尋獲與舉揚十字架瞻禮。聖若瑟、聖若翰、聖伯保、與諸聖瞻禮。護守天神、與聖彌額爾瞻禮。聖奧斯定、與聖德肋撒瞻禮。聖依納爵瞻禮。前主日、本日、與瞻禮後第二日。耶穌聖誕瞻禮前第十二日、與敬禮九日中、首末二日。諸聖瞻禮後第九日。聖若瑟月內第二十四日、月後第十二日。聖心月內第十七日、月後第七日。以上諸日、皆能得全大赦。

又有羅瑪聖處許多大赦、俱亦可得。惟當赴堂、而於聖母祭臺前、加經祈求。

參閱上十五頁

又羅瑪七堂大赦、每月能得二次、惟當赴堂、而於聖母等七祭臺前加經祈求。

又凡爲恭敬天主聖三、聖母始胎、念天主經、聖母經、聖三頌各六遍、皆爲聖教廣揚、異端消滅、人民清泰之意者、每次能得羅瑪七堂、日路聖處、諸天神后聖殿、長雅各伯聖墓種種大赦。羅瑪七堂者、卽聖架、聖母、聖若望、聖保祿、聖斯伯相、聖老楞佐、聖伯多祿大堂也。以上諸堂、每有無數大赦、歷代教皇所准定、不必陳述。日路聖處者、卽教友去拜聖墓、及苦難之迹、亦能得無數大赦。諸天神后聖殿者、近亞西斯城也。蓋前聖方濟、求天主寬賜、凡教友赴此殿者、得全大赦。天主卽准其所求、聿命稟明教皇。教皇已准定、每年一日、入此殿者、每次皆得全大赦。聖雅各伯聖堂者、在斯罷尼國也。凡教友赴斯國入此堂者、亦能得多大赦。以上大赦、不論何處、不拘幾次、而念六遍經者、不必他經、不必告領、而皆能得。大哉其益、廣哉其恩。安居本所、惟



念六遍經言，已如遊行羅瑪、日路、亞西斯、斯罷尼遠地也。更能隨時  
屢次念經，亦如屢次遊行羅瑪、日路、亞西斯、斯罷尼各處也。夜間未  
寐，日中有暇，屢次誦之，屢次能得無數大赦，其益豈淺鮮者乎。此項大赦  
已由教皇庇護十一，於一九三三年四月廿二日，一律取消。凡念六  
遍經者，只可得十年大赦。月內日日誦而告解領主者，可得全赦。  
以上諸全赦，均能讓於煉靈。

## 限大赦

凡默想二刻，即得六十年大赦。

凡顧病人，或與以神哀矜，或與以形哀矜，即不能去顧，爲彼念天主  
經、聖母經、聖三頌，各五遍者，每次能得廿年大赦。吾主耶穌諸瞻禮  
後八日，亦能得廿年大赦。

又有修道數會本瞻禮日，卽如聖若瑟月前，第二十五、第二十一、第十九、第十七、第十六、第十五、第十四、第十三日。月內第六、第七、第十三、第十七、第廿九日。聖母月前，第廿六、第廿三、第十一、第二、第一日。月內第四、第五、第十、第十六、第十七、第廿一、第廿五日。聖心月內，第十二、第十四、第十九日。月後第十三、第二十。聖母升天瞻禮前第十一、第八、第二日。瞻禮後第一、第八、第十二、第十五日。聖母聖誕瞻禮前第六、第三日。瞻禮後第二、第十、第十七日。諸聖瞻禮前第廿二、第十六、第十一、第六、第二日。瞻禮後第十二、第十三、第十九日。割損瞻禮前第十八、第十六日。瞻禮後第十八、第廿一、第廿二、第廿七日。以上諸日，每日均能得廿年大赦。

每逢別等聖母瞻禮日，每行告領聖事者。每送聖體至病人前者。每

爲已領聖體之病人，念天主經、聖母經、聖三頌，各七遍者。每於敬禮耶穌聖誕中七日者，皆得七年七次四旬大赦。

每遇本有全大赦之日，但赴堂中，不告領者。或每晚念申爾福一遍，爲聖教大故加經者。或遇尋獲舉揚聖架瞻禮，行一哀矜者。或每月三次，遇瞻禮六領聖體者。或每逢瞻禮二拜聖體者。每次亦得七年七次四旬大赦。

自封齋前第三主日，至聖枝瞻禮，凡領聖體，而爲聖教大故，念天主經、聖母經、聖三頌各七遍者，每日能得七年七次四旬大赦。

凡赴堂念天主經、聖母經、聖三頌各五遍者，每日能得五年五次四旬大赦。

聖神降臨後八日，每日能得三百日大赦。聽講道，卽得二百日大赦。

做善功、卽得六十日大赦。虔誠誦耶穌聖母聖名、卽得五十日大赦。赴堂而爲存與亡者、念天主經、聖母經、聖三頌、各一遍、卽得五十日大赦。

以上種種大赦、皆能讓於煉靈。且凡教友、生前帶青聖衣、而死後爲彼行彌撒者、卽得破格之恩。厥靈能得全赦、立登天國。

### 諸聖物大赦例規

教皇比阿第九位、恩施大赦於聖珠、聖牌、苦像、等物、或係渠之親聖、或爲鐸之代聖者、均有神效。爰論四端如左。

一、欲得大赦、須將某聖物、或佩己身、或供本所。

二、欲得大赦、該誦要經。而於誦經之時、須以得赦聖物、或佩己身、或供己前爲是。

三、凡聖物之料、或爲繪畫者、或爲鉛錫者、并凡易碎易敗者、皆不能祝聖、以加大赦。

四、欲得大赦、惟在聖後先用者。故欲以之授人、不可先用於己。如或借人、與人、思傳大赦之恩、則并聖物大赦而盡喪矣。又於偶有缺壞者、不可補以他料。業經祝聖者、不可售之他人。

今以四端畧附七解、或有致疑、自可釋耳。

一、若有堅固玻璃珠、亦能聖大赦。

二、若斷落念珠上銅鍊、爲數無多者、不必再聖。抑且落去一二粒聖珠者、可添入、亦不必再聖也。

三、若有買來之物、既聖後、卽或以原價復賣他人、亦難保仍有大赦也。

四、若得他人遺失之聖物者、當求再聖、乃可得大赦之效。

五、所賦苦像大赦，惟在苦像，不在苦架。即使日後換去苦架，不必再聖也。

六、一苦像上，能聖別項大赦，如臨終大赦等，并不必另用許多苦像，卽念珠亦然。

七、凡有苦像與念珠，從日路聖處來者，不必另聖，而已有本章所列諸大赦也。其大赦申設如左。

### 全大赦

凡於臨終候，虔託己靈於主，甘契天主聖旨，卽真悔，告解，領聖體者，或不能全備，卽真悔，誦耶穌聖名者，或不能以口，但以心誦者，均得全大赦。

凡於每主日內，至少一次，習誦玫瑰經五端，或聖母小日課，或已亡

日課、或痛悔七咏、或講要理、或顧囹圄、或視病院、或濟貧人、或聽彌撒者。凡遇耶穌聖誕、三王來朝、耶穌復活、升天、聖神降臨、聖三、聖體、聖母獻堂、領報、升天、聖誕、若翰聖誕、諸位宗徒瞻禮、聖若瑟、諸聖瞻禮、卽得全大赦。惟於真悔告領外、又須熱心求主、爲聖教廣揚、異端消滅、人民清泰、國土安靖、及凡教會大故。

## 限大赦

以上所列瞻禮外、凡遇或天主、或聖母瞻禮、行功如上、卽於瞻禮本日、得七年七次四旬大赦。若于主日等瞻禮、行功如上、則每日得五年五次四旬大赦。又凡平時無瞻禮日、行功如上、亦能得一百日大赦。

凡于每主日內、至少一次、習誦玫瑰經五端、或聖母小日課、或已亡

日課、或惟申正經一節、或惟夜課經與讚美經一段、或痛悔七咏、與聖人列品禱文者、卽於誦經本日、得一百日大赦。

凡于將領聖體、將誦小日課前、備修己靈、敬持己志者、每次得五十日之赦。

凡願獄中之囚、病院之人、而以善功濟之者、并凡堂中講解要理、室中教誨家人者、每次得二百日之赦。

凡於日出、日中、日沒時、聞殿內鐘聲、卽誦三鐘經者、又凡晚時、爲煉靈誦在天、亞物各一遍者、每次得一百日之赦。

凡於瞻禮六、虔思耶穌苦難、苦終、卽誦在天亞物各三遍者、亦得一百日之赦。

凡舉省悔堅改之功、以敬聖三、而虔誦在天、亞物、各三五遍者、以敬



五傷、亦得一百日大赦。凡求天主爲臨終者、卽得五十日大赦。以上所定要功、或有先教宗已賦大赦者、本教宗仍率舊章、不復明改也。以上大赦、俱可讓於煉靈。

諸聖功大赦例次

今夫奉教之人、豈有虛度一日、概蔑靈修者乎。矧又熱心繕靈者、類皆習誦數經、習行數功、以爲精修之助。但於所誦所行中、或有大赦之加、而未曾明晰者、亦復不少。不亦徒受大赦之勞、而莫受大赦之益乎。余故簡舉此中大赦、申敍於茲。俾行之者、知其理而卽蒙其效、不致失破格鴻恩耳。

素行神功大赦

一、諸神功中、恩赦至多者、苦路經是也。向時日路撒冷聖地、十四處全

備者、每處有全大赦、而復有限大赦、均可讓於煉靈。今時苦路聖功、亦可得一全大赦、而不必以告解、領聖體爲要。惟除人衆擁擠外、總當周行十四處、虔意誠心、仰憶耶穌苦難之迹、而不可懈也。

二、教皇本篤第十四位恩施、凡以不拘何文言、心口如一、念信望愛三誦、每次得七年七次四旬大赦。若每日誦之、一月內告領一次、能得全大赦。臨終之候亦然。其大赦均可讓於煉靈。

三、教皇本篤第十四位又施、凡每日默想、至少一刻、一月內告領一次、得全大赦。

四、教皇額我略第十三位恩施、凡於主日、或瞻禮日、解罪之後領聖體、求主爲教皇本意、教會大故者、卽得五年大赦。凡每月一次、并于耶穌、聖母、宗徒、及若翰誕日諸瞻禮、善領聖體者、其瞻禮本日、能得十

年大赦。并於本處首主保瞻禮、若行告領、能得全大赦。

五、教皇比阿第六位恩施、凡於堂中耶穌聖心像前、按教皇之意、而微時誦經者、每年得七年七次四旬大赦、亦可讓於煉靈。

六、當建立聖體、與耶穌苦難瞻禮、意將告解、而朝拜聖體堂者、每次能得十年十次四旬大赦。朝拜聖體堂、而念經按教皇之意、或聖體本日、或復活瞻禮、善領聖體者、即得全大赦。均可讓於煉靈。

七、教皇額我畧第十三位恩施、凡於公彌撒中、既聞舉揚聖體之鈴、即入堂敬拜聖體者、每次得二年大赦。

八、凡遇聖體瞻禮、解罪而與聖祭者、即得四百日大赦。瞻禮後八日中、敬與聖祭者、每次得二百日大赦。且或瞻禮本日、或瞻禮後八日中、勤行告領、復送聖體遊堂、又念經爲聖教大故者、即得二百日大赦。

以上諸赦，亦可讓於煉靈。又當耶穌聖心瞻禮，領聖體，在堂念經，按教皇之意者，可得全大赦。

### 簡行善功大赦

一、教皇保祿第五位恩施，凡以二刻時，或自習要理，或訓人要理，每次得一百日大赦。教皇格肋孟第十二位復准，凡既告領者，或聽解要理，或講解要理，每次得七年七次四旬大赦。又習行此功者，凡遇耶穌聖誕、復活，及聖伯多瞻禮，能行告領，可得全大赦。

二、比阿第六位重准，凡於主日等瞻禮日，公彌撒中，虔誠聽解聖經者，每次能得七年七次四旬大赦。若於耶穌聖誕、耶穌復活、聖神降臨，三王來朝、聖伯保瞻禮，行告領、聽講道者，即得全大赦。

三、凡敬憶耶穌、聖母、聖若瑟，即悔往失，而供食於貧窶三人者，每次得

七年七次四旬大赦。若此日亦行告領，誦經按教皇本意，則可得全大赦。凡家人助此哀矜者，能得一百日大赦。此教皇比阿第七位寬之也。

四、教皇意諾生第十二位恩施，凡執燭而送臨終聖體者，能得七年七次四旬大赦。不執燭而送者，惟得五年五次四旬大赦。教皇本篤第十四位恩諭，可讓於煉靈。教皇保祿第五位准定，不能躬送聖體，而誦天主經、聖母經各一遍，按教宗之意，亦得一百日大赦。

五、教皇比阿第七位恩施，凡敬禮耶穌聖誕前九日者，每日得三百日之赦。并於瞻禮本日，或於後七日內，能行要功一次者，即得全大赦。又年內，不拘何時，復行此功者，即復得此恩。

六、凡誦憑己所擇經文，以敬禮聖三，或九日，或三日者，每日能得七年

七次四旬大赦。至於末日，領聖體，赴堂念經，按教皇之意，卽得全大赦。以上諸赦，亦可讓於煉靈。

七、教皇比阿第七位恩施，凡敬禮聖母月，而每日或誦數經，或行數德者，每日得三百日大赦。聖月內，一次行要功，亦得全大赦。均可讓於煉靈。中華信友，敬禮聖若瑟月，亦然。

八、教皇格肋孟第十二位恩施，凡以連及之六主日瞻禮，爲敬禮聖類斯，而或恭行默想，或虔誦數經，或誠修美德，并行要功者，每次得全大赦。又聖人本瞻禮，赴堂敬瞻其像，而盡要功者，亦有全大赦。

### 習誦經文大赦

一、教皇本篤第十三位恩施，凡旣聞殿鐘之聲，或日出，或正午，或日沒，卽誦三鐘經，每次得一百日大赦。若每日至少一次，月內虔行告領

者、能得全大赦。此經本須跪誦、惟本篤第十四位寬諭、瞻禮七晚時、及主日立誦。望復活晚、至天主聖三前夕、所誦聖母喜樂經、亦當立誦。教皇比阿第六位恩准、凡不能聞殿鐘聲、而於旦午晚三時、仍誦此經者、亦每次可得大赦之恩。

二、教皇比阿第七位恩施、凡憶耶穌苦終、與聖母悲痛、而誦在天亞物各三遍、均爲臨終者、卽得三百日大赦。若每日誦此、一月內一次告領、亦得全大赦。均可讓於煉靈。

三、教皇比阿第七位又施、凡誠悔記憶耶穌苦難、而誦在天亞物各五遍、并誦今懇扶佑諸僕、當時以寶血救贖者、望主賜伊等永安、及永光照之、息止安所、亞孟、均爲已亡者、卽得三百日之赦。若每日誦之、一月內一次告領、亦得全大赦。俱可讓於煉靈。

四、教皇比阿第六位恩施，凡於晚時，跪誦聖咏，主子自幽谷云云，或不知此經，卽誦在天，亞物，望主賜伊等各一遍，爲煉靈者，每次得一百日之赦。若一載之久，每日誦之，可憑己擇日，敬行要功，而得全大赦。

五、教皇比阿第六位又施，凡誠悔而誦聖神聖歌，肇有聖神，請降顧我云云，卽於瞻禮本日，及後七日，能得三百日之赦。其餘不論何日，可得一百日大赦。若每日誦之，一月內行要功，亦得全大赦。可讓於煉靈。

六、教皇西斯篤第五位恩施，凡專意誠心，誦耶穌瑪利亞聖名，卽得二十五日大赦。若於平時習誦，至臨終時，仍能真悔虔誦者，雖或不能口誦，但以心誦，亦得全大赦。

七、教皇比阿第六位恩施，凡誦聖體讚句云，吾主至聖之體，我等願常



爲讚美、常爲感謝者、每日得一百日大赦。又每瞻禮五、并聖體瞻禮本日、及後七日內、虔誦三次者、每日得三百日大赦。又若每日誦此、月內一次行要功者、亦得全大赦。

八、教皇比阿第六位又施、凡熱中悔心、誦聖母讚句云、卒世童貞、眞福之瑪利亞、無玷至聖之始胎、我等願爲讚美者、亦得一百日大赦。

九、教皇比阿第六位又施、凡欲補聖母聖人所受之辱、而午前、則誦申爾福一遍、午後、則誦求聖母救急難祝文一遍、又加二遍附經云、聖童貞、賜我讚美爾、與我攻敵仇之能、天主於厥聖人爲稱頌、亞孟、每日能得一百日大赦。并每主日、能得七年七次四旬大赦。又若每日誦此、一月內二次行要功、亦得全大赦。又凡習誦此經者、於聖母諸瞻禮、及諸聖瞻禮行要功、亦得全大赦。又臨終之候、亦有全大赦。惟

須告解、領聖體。如或不能、則誠心痛悔、斷不可少。

十、教皇比阿第七位恩施、凡真悔往失、而誦聖母禱文、可得三百日大赦、亦可讓於煉靈。若每日誦之、凡遇聖母始胎、聖誕、領報、受潔、升天、五瞻禮、入堂求天主、按教皇之意、及行告解、領聖體者、亦得全大赦。

十一、教皇比阿第七位又施、凡欲敬謝聖三、特貺聖母升天之大恩、而旦、午、暮、誦聖三頌、每次三遍者、能得三百日大赦。若惟誦一次、惟得一百日大赦。若每日誦三次、一月內、一次行要功、亦能得全大赦。

十二、凡誦天主天神、領守我者云云、每次得一百日大赦。若每日誦之、一月內、一次赴堂行要功、得全大赦。若平時習誦、直逮臨終之時、亦得全大赦、亦可讓於煉靈。此教皇比阿第七位恩准也。

十三、教皇比阿第七位又准、凡悔心而念向耶穌聖靈誦者、每次能得

三百日大赦。領聖體後誦之，即得七年大赦。每日誦之，而月內告領，赴堂念經，按教皇之意，即得全大赦。以上諸赦，亦可讓於煉靈。

### 選誦經言大赦

#### 一、契合聖旨誦

至義至上至愛者，天主聖旨兮。諸事望此承行，且頌且揚於無終之世。亞孟。悔心敬誦右經者，每日得百日之赦。每日誦之，而年內敬行要功者，每年得全大赦。平生誦之，而臨終甘符主命者，亦得全大赦。均可讓於

煉靈。

#### 二、敬獻聖血誦

無始無終，天主聖父，我爲己罪補贖，聖教大故，而以耶穌至寶聖血，虔獻於爾。教皇比阿第七位恩施，凡能虔誦右經者，每次得百日大赦。

### 三、奉獻己心誦

至愛哉耶穌兮。我某以全體奉爾，全心獻爾，藉以表我微悃，補我往愆。仰爾上佑，永持我志，以後再不復犯。仰瞻聖心聖像，誠悔而誦右經者，每日可得百日大赦，每月誦之，月內一次行要功者，亦得全大赦，俱可讓於煉靈。

### 四、向耶穌釘死誦

吁，盡仁盡甘耶穌哉。我跪伏於爾臺前，肫肫顫爾。且求且懇，使以信望愛之切效，悔責我愆之誠，鞏固悛改之旨，銘刻於我懷中。我惟罄情抱歉，緬懷默體。神目諦視於爾五傷，爰意留於達未先知，代爾而言曰：已鑿予手予足，已數予體諸骸矣。天主降生一千八百二十一年，教皇比阿第七位參訂格肋孟

第八位，暨本多第十四位所恩准者，重示曉諭。凡既告解，領聖體，於耶穌釘死聖像前，心悔神專，持誦右經者，即得全大赦，亦可讓於煉靈，能救一

靈早升。○按上經，今譯作吁純善至溫之耶穌云云，見謝聖體經。

五、向耶穌苦終誦

至仁耶穌哉，人靈良友兮。宇下之罪人，今時臨終，而今日將死者，胥望爾血滌淨。卽仰爾心苦終，爾母苦衷，是懇是求。亞孟。耶穌聖心，苦於終時者，望爾垂憐瀕死之人。

悔心敬誦右經者，每次可得百日大赦。亦可讓於煉靈，每日三時誦之，而月內

告領詣堂誦經者，亦得全大赦。教皇比阿第九位恩准。○按右經，今改作吁至仁耶穌，鍾愛靈魂者云云。

六、向聖母始胎誦

吁，童貞聖母，始終不染原罪之玷，本罪之疵者。我乃以心之潔，怙恃

於爾。

凡信友虔誦右經者，能得一百日大赦。教皇比阿第九位恩准。

七、向聖母痛苦誦

亞物瑪利亞，滿被痛苦者，釘死吾主與爾偕焉。女中爾爲悲泣，爾胎子耶穌，並爲悲泣。釘死主之母聖瑪利亞，我實釘死爾子者。今賜相與痛哭，及我等死候。亞孟。

凡悔心而誦右經者，每次能得一百日大赦。

#### 八、恃怙聖母誦

至仁哉，童貞瑪利亞，望爾記憶。從未聞奔爾衛，呼爾佑，求爾救，而有一愬置之者。童身之聖童身者母，我倚此而舒懷。卽趨赴爾，歸附爾。哀漣之罪人，伏爾臺前。天主聖母，勿藐我禱。卽藹然俯聽，慨然垂允。亞孟。

教皇比阿第九位准，凡信友不拘何時，誦此經一遍，每次能得三百日大赦。若每日誦之一月內一次，眞悔告解，領聖體，赴堂誦經，按教皇之意者，能得全大赦。天主降生一千八百四十六年頒行。以上大赦可讓於煉靈。

#### 九、求託聖母誦

我之主母，我之母。我全全獻已於爾，亦以證我真實爲爾孝子。卽將我目，我耳，我口，我心，我全靈，全身，今日無不爲爾付託。慈母，我旣皆繫于爾。乃爾保我護我，如屬於爾之物一般。

被誘求護誦

我之主母，我之母，望爾記憶，我皆繫爾。乃爾保我護我，如屬於爾之物一般。教皇比阿第九位，准凡一日內，早夜二次，熱心悔改，先誦聖母經一遍，卽念右二誦者，每日得一百日大赦。一月內，日日誦，不拘何日，眞悔，告解，領聖體，到堂誦經，按教皇之意者，可得全大赦。亦可讓於煉靈。且凡遇誘惑時，熱心悔改，而念求護誦者，每次有四十日大赦。亦可讓於煉靈。天主降生一千八百五十一年恩准。

十。祝頌聖心誦

耶穌天主之心兮，聖母至潔之心兮，我願處處時時，爲認而讚，爲頌

而愛、爲奉而榮。亞孟。

虔誠誦之、每日可得六十日大赦、一月誦之逢聖母聖誕、升天瞻禮、卽得全大赦、每日誦之、臨終時、

亦能得全大赦。

### 十一、申福誦

申爾福、滿被聖寵者、主與爾偕焉。望爾之寵、亦與我偕焉。女中爾爲讚美、爾母聖亞納并爲讚美。蓋彼生爾、無玷童貞聖瑪利亞。爾乃生子、無始上主吾主耶穌。亞孟。虔誠眞悔、敬誦右經者、每次可得百日大赦、每月十次誦之、敬奉聖婦亞納瞻禮、詣堂行要功者、亦得全大赦。

教皇比阿第七位恩准。

### 十二、三誦經

耶穌若瑟瑪利亞、我心、我靈、全獻於爾。耶穌若瑟瑪利亞、望爾相助于我終時。耶穌若瑟瑪利亞、望我之息、偕爾安絕。教皇比阿第七位諭、專心誦右經者、可得



三百日大赦。亦可證於煉靈。天主降生一千八百有七年恩准。

十三、濟美誦

吁、類斯聖人兮、若天神之美質。我縱無功之役、而我形神之淨德、特付於爾。卽爲爾若天神之潔、懇爾轉求無玷羔羊耶穌、無損童身聖母。望爾戒我、弗罹重愆、佑我弗染淫惡。倘我負誘履險、祈卽絕我穢念、去我污私。乃舉四末悠永之思、吾主釘死之念、繞我記司。復以畏主之畏銘我懷、愛主之愛燃我心。俾之師爾於地、得享天主、偕爾於天。亞孟。

教皇比阿第七位恩准。○凡能心悔神專、旣誦右經、又加在天亞物各一遍者、卽得一百日大赦。天主降生一千八百有二年頒發。

